

Noor Mohamad
Shakil Hameed

HARIAN METRO

R ekod pihak Polis Diraja Malaysia (PDRM) menunjukkan 392 pelajar sekolah serta penuntut universiti awam dan swasta di seluruh negara ditahan kerana dipercayai terlibat dengan kegiatan dadah dari Januari hingga April tahun ini. Ini menunjukkan ancaman dadah terhadap golongan belia semakin membimbangkan sekali gus memerlukan langkah pencegahan se-wajarnya.

Walaupun pihak berkuasa baik polis maupun Agensi Antidadah Kebangsaan (AADK) secara berterusan melakukan aktiviti penguatkuasaan di samping menganjur pelbagai program kesedaran dan pencegahan, namun kegiatan penagihan dan pengedaran dadah terutama dalam kalangan belia termasuk pelajar sekolah terus berlaku. Mengikut statistik Jabatan Siasatan Jenayah Narkotik (JSJN) Bukit Aman, daripada 392 kes, sebanyak 187 pelajar sekolah menengah direkodkan terlibat dengan pelbagai jenis kesalahan berkaitan dadah mengikut Akta Dadah Berbahaya (ADB) 1952, Akta Racun 1952 dan Akta Penagih Dadah (Rawatan dan Pemulihan) 1983. Kesalahan tertinggi dicatatkan membabitkan penagihan dadah iaitu 74 orang diikuti kesalahan memiliki dadah sebanyak 50 orang. Sebanyak 43 pelajar pula ditahan atas kesalahan terlibat dengan pemilikan air ketum. Lebih membimbangkan apabila empat pelajar berdepan hukuman gantung sampai mati jika disabit kesalahan kerana kesalahan mengedar dadah. Semua pelajar yang terlibat ini adalah mereka yang bersekolah menengah berusia antara 13 hingga 17 tahun. Dalam pada itu, seramai 115 penuntut universiti serta 90 penuntut universiti swasta pula ditahan polis bagi tempoh yang sama. Ironinya, dadah sudah tidak kenal mangsa, baik pelajar sekolah maupun penuntut universiti semuanya tidak terlepas.

Sudah jelas, semua pihak perlu melihat secara serius ancaman dadah terutama kepada golongan belia kerana masa depan negara akan hancur musnah jika generasi pewaris masa hadapan ini dibiarkan terlibat dengan dadah seperti ini. Melihat kepada statistik tangkap polis ini antara persoalan utama yang bermula di minda kita ialah, apalah nasib dan masa depan semua pelajar yang ditahan ini? Pada usia yang sepatutnya digunakan sepenuhnya untuk menimba ilmu dan menjadi manusia yang berguna, mereka terpesong hingga terjebak dengan najis dadah. Semoga mereka yang ditahan ini dapat dirawat dan dipulihkan dengan segera.

Melihat ke hadapan ancaman dadah ini kelihatan terus membelenggu masyarakat kita. Dari pelajar sekolah, universiti

Lindungi belia terjebak najis dadah



hingga ke golongan dewasa baik lelaki maupun perempuan semuanya terdedah dan berpotensi untuk terlibat dengan dadah baik sebagai penagih maupun sebagai pengedar. Jadi, langkah pencegahan perlu diambil dengan segera supaya kita tidak lagi disajikan kes dan statistik yang tragis seperti ini. Antara langkah pencegahan utama ialah peranan ibu bapa perlu dipertingkatkan. Sebagai individu yang paling rapat dengan anak, ibu bapa perlu mengambil peluang dan ruang untuk sentiasa melindungi dan juga menyedarkan anak-anak tentang bahaya najis dadah termasuk kesan jangka pendek

dan jangka panjang.

Ibu bapa perlu terapkan sikap benci dadah dalam sanubari anak masing-masing sejak sekolah rendah lagi supaya nasihat dan larangan itu terpatri kemas dan benak fikiran mereka untuk selama-lamanya. Hal ini mampu memberikan kesan yang cukup signifikan kerana kita percaya anak pada umur sekolah rendah kebiasaan akan mengikut saja segala nasihat, tegahan maupun larangan ibu bapa mereka. Oleh itu, ibu bapa perlu tegas mlarang dan memberi nasihat kepada anak-anak supaya kita dapat melentur buluh dari rebungnya.

Hakikatnya, kebanyakan

individu yang terlibat dengan dadah memberikan alasan terlibat dengan dadah kerana terpengaruh dengan rakan. Untuk mencegah perkara seperti ini terus berlaku, ibu bapa perlu memainkan peranan dengan cara mengambil tahu segala gerak geri dan aktiviti anak mereka di luar rumah terutama dengan siapa mereka sering bergaul. Sebagai ibu bapa, kita bertanggungjawab sepenuhnya melindungi anak kita daripada gangguan dan pengaruh anasir luar yang cuba mempengaruhi mereka. Jangan lupa kalau kita leka memantau hal ini, sindiket pengedaran dadah juga akan mengambil kesempatan

untuk merekrut anak-anak kita menjadi pengedar baik dalam maupun luar sekolah.

Di samping itu, kita juga berharap pihak sekolah dan universiti secara beterusan akan mengadakan pelbagai program kesedaran dan pencegahan supaya anak-anak ini dari semasa ke semasa diberi peringatan berkaitan ancaman, bahaya dan kesan najis dadah. Sesuaikanlah aktiviti dengan kaedah yang sesuai, kreatif dan mudah supaya dapat menarik minat dan perhatian kumpulan sasaran baik pelajar sekolah maupun penuntut universiti. Dalam konteks ini, pastikan program dilaksanakan secara berkala dan istiqamah dan bukannya dibuat hanya bila ada kes.

Hakikatnya, dadah musuh nombor satu negara. Terlalu banyak kesan buruk dan musibah berlaku dalam masyarakat angkara dadah termasuk insiden anak yang sanggup membunuh ahli keluarga sendiri apabila permintaannya ditolak serta ketika di bawah pengaruh dadah. Jadi, kita perlu hentikan malapetaka ini daripada terus menghancurkan masyarakat dan negara. Marilah kita berganding bahu melindungi dan menyelamatkan anak-anak daripada terus terlibat dengan najis dadah. Jom perangi dadah habis-habisan.

**Penulis Timbalan Pengarah
Pejabat Strategi Korporat
dan Komunikasi Universiti
Putra Malaysia**